



Diskursu JSMP hanesan benifisiariu iha selebrasaun Loron Internasional ba Feto no Lansamentu Fundu Marsu 2015

Selebra Loron Feto Internasional no Lansamentu Fundu ba Programa Halakon Violénsia Hasoru Feto hosi Governu Australia liuhosi Fundasaun Azía-TAF

Diskursu JSMP hanesan benifisiariu iha selebrasaun Loron Internasional ba Feto no Lansamentu Fundu hosi: **Ana Paula Marçal, Kordenadora Unidade Peskizador Juridiku-JSMP**

Ohin loron ita selebra Loron Mundial ba Feto. Ita rekonese katak feto nia kontribuisaun iha iha área hotu-hotu ne'e sentrál teb-tebes – ne'e inklui iha vida política, iha vida ekonómia, iha área justisa, iha ita nia governu no ita nia komunidade sira. Ita selebra hamutuk feto-sira nia kontribuisaun, sira nia dedikasaun, sira nia luta no lideransa.

Ita mós rekoñese katak feto sira kontinua infrenta desigualdade no diskriminasaun oi-oin iha sira nia moris lor-loron iha fatin hotu-hotu, inklui mós iha Timor-Leste. Ne'e nu'duar forma diskriminasaun no desigualdade ne'ebé inklui violénsia hasoru feto no labarik feto.

Desigualdade hasoru feto hanesan kauza ba violénsia hasoru feto, nomós desigualdade ne'e reforsa violénsia hasoru feto no rezulta ema bele hanoin katak violénsia hasoru feto hanesan baibain ka normal iha sosiedade.

Ha'u servisu tinan kleur ona ho Programa Monitorizasaun Sistema Judisiál ka JSMP hanesan monitorizadór iha tribunal no koordenadora.

Durante ha'u nia servisu, ha'u observa no rejista kazu barak iha tribunal ne'ebé envolve vítima feto sira. Kazu sira ne'e envolve violénsia ne'ebé grave liu – violénsia fíziku, violénsia seksuál (insestu) no violénsia bazeia ba jenéru sira seluk. Kazu balun ita haree hanesan forma tortura hasoru feto, no dala barak perpetradór mak mane ne'ebé sira fier ba – hanesan sira nia laen no sira nia aman rasik ne'ebé tuir lolos tenke proteze sira husi violensia ka potensia ba violensia hosi liur.

Rua setubal, Colmera, Dili Timor Leste

PoBox: 275

Telefone: 3323883

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Dala barak vítima sira hetan justisa no sente satisfas ho prosesu justisa formal no desizaun ne'ebé tribunal sira hatun. Maibé, iha kazu barak, JSMP observa katak balun la satisfas ho desizaun ne'ebé tribunal sira hatun.

Purzemplu, iha fulan Janeiru 2015, iha tribunal julga kazu violénsia doméstika ida ne`ebé laen hasoru nia feen. Arguidu lori besi-kanu baku iha lezada nia matan fukun, lori baliu baku iha lezada nia kidun no lori mós baliu ko'a kanek iha lezada nia kabun.

JSMP fier katak ita boot sira bele sukat oinsa sasan kro'at ka material sira hanesan besi-kanu no baliu nia kauza potensia risku ba ema nia vida. JSMP fier katak uja sasan kro'at no todan hanesan ne'e alende bele iha potensia atu hamate ema nia vida, nune'e mós psikolojikamente afeita teb-tebes vitima nia neon no sei hamosu trauma.

- Aktu hirak ne'e kauza lezada hetan bubu iha nia matan fukun, kidun no kanek iha lezada nia kabun.
- Ministériu Públiku akuza de'it ho artigu 145 Kódigu Penál kona-ba krime ofensa ba integridade fizika simples konjuga ho artigu 35 Lei Kontra Violénsia Doméstika.
- JSMP hanoin katak faktu sira ne'ebé asosiadu hosi krime grave, hanesan krime maus tratus ba kónjuje tuir artigu 154 Kódigu Penál ka ofensa ba integridade fízika grave ho intensaun atu hamosu perigu ba nia vida tuir artigu 146 Kódigu Penál.
- Instrumentu ka materiál hirak ne'ebé arguidu uza hodi ezekuta krime ne'e, manifesta arguidu iha intensaun atu hamosu risku ka iha potensia atu hamosu risku seriu ba lezada nia vida. Infelismente, tribunál konsidera akuzasaun orijinal no kondena arguidu ho pena prizaun fulan 6 suspende ba tinan 1.
- Kazu ne'e ilustra exemplu hosi kazu barak ne'ebe involve violensia domestika. Ministériu Públiku no Tribunál tenke asegura akuzasaun no pena ne'ebé nesesariu tuir krime nia gravidade.

Oinsá ita bele muda situasaun ne'e atu feto sira ne'ebé buka protesaun ba sira nia aan husi ita nia sistema justisa formal no bele hetan protesaun másimu no justisa ne'ebé justu?

Ha'u hanoin ita presiza lideransa forte husi autór judisiáriu sira, sosiedade sivíl no governu. Ita tenke rejeita violénsia hasoru feto hanesan asuntu baibain.

Desizaun sira husi tribunal tenke tuir gravidade ba krime hasoru feto, no tau hanesan prioridade sira nia seguransa no restituisaun ba violénsia ne'ebé sira hetan.

Ita haree ona mudansa positivu iha kazu sira ne'ebé envolve inwestu – agora daudaun, tribunal fó sentensa ne'ebé todan duni ba perpetrator sira. Liuliu, ita presiza lideransa forte husi feto sira ne'ebé iha posizaun podér iha ita nia vida política. Atu sira bele ko'alía kona-ba vítima sira ne'ebé la bele ko'alía ba sira nia an-rasik tanba tauk no moris iha violénsia nia laran.

Kontribuisaun husi organizasaun hanesan JSMP, ALFeLa, PRADET no uma mahon sira mós importante. Tanba ita presiza hatene di'ak kona-ba vitima feto nia situisaun no fó suporta nafatin sira atu sira bele sai husi violénsia.

Ba oportunidade ida ne'e, ami hakarak agradese boot ba Fundasaun Azía no Governu Australianu nia apoiu ba JSMP no organizasaun sira ne'ebé servisu besik ho feto. Apoiu fundus ne'e signifika JSMP no organizasaun sira ne'ebé marka prezensa ohin loron bele kontinua servisu ba feto no labarik feto sira nia Timor.

Atu hetan informasaun kompletu favor kontaktu:

Luis de Oliveira Sampaio
Diretor Ezekutivu JSMP
E-mail : luis@jsmp.minihub.org |